

De reliquorum planetarum, uel syderibus, uel radijs, termino Martis occurrentibus, simili prorsus ratione iudicabimus, sicut de altera infortuna Saturno supra ostendimus, nisi quòd huius cum Marte commixtiones, significant damna, ac frustrationes spei & fiduciae.

Si tamen Solis, Veneris, aut Iouis radij ad eundem terminum accesserint, liberabitur natus, ac obtinebit uictoriam in istis uitae, ac fortunarum periculis, uerum comitabuntur tamen hanc liberationem sua incommoda, & uictoriam praecedentis luctae ac pugnae satis atroces, quam quidem satis cruentam habebit.

Ac si Mars quoque Saturno ad terminum ipsius radios suos proijciente, simul eundem terminum diuisionis, ac Saturnum respexerit, cumulabuntur utriusque infortuna malignitates uniuersae, ac genus omne infortuniorum secundum commixtionem qualitatum, ac naturarum utriusque maleficae cum tristitia, ac perturbatione animorum, angore, labore, penuria, summisque doloribus. Idem natus nec hostiles effugiet manus, uim atque iniurias. Et nisi feliciores Stellae Iouis, aut Veneris, regiumue Solis sidus ex fortibus locis ac idoneis, eundem diuisionis terminum lumine suo illustrauerint, natus post exantlatos maximos labores, summaque uitae discrimina in foelici, crudeli, ac uiolenta morte peribit.

Verum Iouis ad eum terminum aspectus, dolores ac perturbationes, tristesque luctus, & graues iras à regibus nato minatur, non sine magnarum dignitatum, honorum, ac officij eius nati periculo, & amissione.

Si uero Venus eodem radios suos proiecerit, damna à mulieribus prouenientia, & in filijs suis natus experietur.

Si uero Solis ibidem existant radij, significant combustiones, & damna ex parte patris, principumue, ac regum potentum, uel nobilium uirorum. Sed haec de Marte termini diuisionis domino dicta sufficiant. Reliqua ex ipsa commixtione significationum, ac qualitatum radiorum, eodem in loco concurrentium industrius Mathematicus pro sua prudentia erudite uenabitur.

Iam institutae orationis series postulat, ut de Venere quoque dicamus, cui si dominium diuisionis obtigerit, nato res secundas, ac prosperos in coniugio successus largitur, maxime si anni quoque & reuolutionis gubernatrix fuerit, & si applicuerit ad locum in quo fuit pars coniugij in radice natiuitatis. Venus enim fortuna, ac stella foeminina, gaudiorum ac uoluptatum est domina, iucundasque uxores, & dulces natis conciliat amicos. Ac si praeterea eadem radijs suis pertigerit ad illum diuisionis suae terminum, foeminam nobilem nato desponsatam iri significat, ex qua diuitiarum affluentiam, & ornamentorum muliebrium preciosas opes magnasque consequetur.

Si uero Iupiter terminum diuisionis, ac dominij Veneris suo illustrauerit lumine, eadem omnia pro naturae suae liberalitate & benignitate, & uberiora & feliciores nato promittit.

Si Mercuriales ibidem inueneris radios, ingenij & animi dotes diuinis plane augebuntur incrementis. Idem tamen pro mobilitate sua lasciuos ac petulantes motus, uagasque libidines in animis excitat, & illicit natum ad illicitos meretricum concubitus. Qui quidem radij si in loco eidem termino opposito fuerint inuenti, utilitatem aliquam capiet natus ex muliebribus consilijs. Si uero alio quouis aspectu radij Mercuriales terminum diuisionis, ac gubernationis Venerae tetigerint, dolores & animi aegritudinem propter uxorem natus habebit, uel mortem coniugis suae lugebit.

Si Mars lumine suo occupauerit, uel aspexerit praedictum terminum, uxori nati triste minatur fatum mortis, aut longarum aegritudinum, aut conciliat nato lites. damnaue propter mulieres, muliebriaue negocia, aut earum causa forte sustibus cedetur.

His